

UCAPAN PERDANA MENTERI MELALUI
RADIO/TV MALAYSIA SEMPENA ME-
NYAMBUT ULANGTAHUN HARI KEBANG-
SAAN YANG KE LIMA BELAS PADA 30HB
OGOS, 1972

Saudara-saudara sekalian,

Besok kita merayakan Hari Kebangsaan menyambut ulang tahun ke lima belas Kemerdekaan negara kita Malaysia. Marilah kita bersama-sama bersyukur kepada Allah Yang Maha Kuasa atas petunjuk dan inayahNya kepada kita sekalian, melimpahkan kemakmuran dan memberikan perlindunganNya kepada kita semua.

Semasa kita semua menyambut peristiwa yang penting ini dan merayakannya dengan apa cara yang patut, sukaiah saya mengucapkan selamat kepada saudara-saudara sekalian serta terimakasih di atas kepercayaan terhadap Kerajaan dan sumbangan serta kerjasama dalam usaha-usaha negara. Sambil itu, saya ingin mengajak saudara-saudara merenungkan sebentar keadaan negara dan masyarakat kita hari ini serta memikirkan adakah kemajuan setakat ini memuaskan dan apakah yang patut dititikberatkan bagi tahun-tahun akan datang.

Dengan mengetahui pokok-pokok kejayaan yang telah dicapai dan menyedari pula kelemahan serta kekurangan yang perlu diperbaiki, saya yakin kita sekalian akan bersedia mengorak langkah baru dan memasuki tahun kerja yang baru dengan penuh keyakinan dan keazaman meneroka masa depan yang lebih cemerlang bagi kita dan untuk jenerasi akan datang.

Saudara-saudara sekalian,

Sebenarnya tempoh lima belas tahun bukanlah lama dalam kehidupan suatu bangsa. Kalau diibaratkan dengan hidup manusia, kita baru hanya mencapai taraf dewasa. Bagaimanapun, kita boleh berbangga bahawa dalam jangka waktu yang singkat itu, kita telah dapat mencatatkan beberapa banyak kemajuan dalam semua lapangan, khasnya dalam usaha hendak memberikan rakyat jelata kehidupan yang sempurna dalam keadaan rukun damai baik di kampung maupun di bandar.

Saudara-saudara sekalian,

Tidak siapa yang boleh menafikan hakikat bahawa kejayaan usaha pembangunan negara selama lima belas tahun yang lepas ini membawa kita jauh kedepan dari masa kita mula-mula mencapai kemerdekaan dulu. Bahkan kalau kita tinjau semula kebelakang, memutar balik rangkaian peristiwa semenjak 31 Ogos, 1957, akan lebih jelas betapa banyak usaha dan tenaga yang telah dicurahkan oleh rakyat dari semua golongan menjadikan negara Malaysia seperti yang kita ketahui hari ini.

Akan tetapi kita tidak harus lupa bahawa kemajuan yang kita capai itu bukanlah dengan cara mudah, berlaku dengan lancar dan licin tanpa sebarang kesulitan atau rintangan. Sebaliknya, berkat ketabahan hati dan keamanan yang teguh di kalangan rakyat dan pemimpin-pemimpin negara, maka kita telah berjaya mengatasi segala kesulitan dan merempuh segala rintangan bagi memenuhi matlamat negara.

Peristiwa bersejarah yang akan dirayakan oleh seluruh rakyat di segenap pelusuk negara, dari Perlis ke Sabah, sudah semestinya membawa rasa paling gembira kepada jenerasi saya yang turut memperjuangkan kemerdekaan dulu dan bersama-sama pula mengisi kemerdekaan itu. Pada hemat saya, sumbangan bakti untuk mengisi kemerdekaan ini adalah sangat penting kerana inilah yang dapat diwariskan dan untuk disambung pula oleh jenerasi yang akan datang.

Selain daripada sumbangan fizikal dan material, dalam erti-kata kemudahan-kemudahan hidup dan perkhidmatan sosial, sumbangan yang saya anggap besar sekali maknanya kepada negara ialah Rukunegara. Pada perayaan ulangtahun yang ke empat belas tahun lalu, kita telah mengambil "Bersatupadu" sebagai tema perayaan. Tahun ini kita memilih "Masyarakat Adil" sebagai tema Hari Kebangsaan 1972. Saya fikir tema ini sungguh kena pada masa dan tempatnya iaitu semasa kita sedang giat dengan pelaksanaan Dasar Ekonomi Baru Kerajaan yang telah memasuki tahun keduanya.

Saudara-saudara sekalian,

Tema Masyarakat Adil yang kita titikberatkan ini berhubung erat dengan konsep keadilan sosial atau social justice yang merupakan intisari dari perjuangan hidup setiap manusia, terutama sekali

bagi Bangsa kita Malaysia. Hasrat inilah yang menggerakkan kita merancang dan melaksanakan usaha pembangunan besar-besaran, dengan tujuan membawa perubahan kepada rakyat daripada corak masyarakat yang terjajah kepada masyarakat negara yang bebas dan merdeka. Usaha-usaha pembangunan luar bandar dilaksanakan dengan objektif membangunkan rakyat kampung dan desa yang telah terbiar sekian lama dalam zaman penjajahan dulu.

Kita bersyukur bahawa tugas zaman peralihan ini telah pun dijayakan dengan seberapa yang boleh. Perubahan-perubahan yang terdapat di mana-mana, dalam bentuk sekolah dan klinik, jalan kampung dan jambatan, bekalan air dan letrik dan projek rancangan tanah adalah bukti yang nyata dan tidak siapa yang boleh menafikan.

Saya ingin saudara-saudara faham bahawa langkah-langkah setakat ini hanya untuk memenuhi objektif zaman peralihan sebagai batu asas untuk membentuk masyarakat adil yang dicita-citakan itu. Sebagaimana bangsa-bangsa lain di dunia, kita juga ingin menjadi bangsa yang maju dan bertamaddun dan kerana itu mustahaklah kita mempunyai pandangan yang jauh, memikir dan menimbang rupa bentuk masyarakat bangsa Malaysia bukan untuk seratus atau dua ratus tahun bahkan untuk selamalamanya. Garis untuk masyarakat masa depan kita telah pun ditentukan dengan jelas dalam Rukunegara, yang pada hemat saya, meliputi seluruh aspek fizikal dan spiritual sesuai dengan kehendak-kehendak bangsa kita. Keperluan-keperluan masyarakat moden yang bergantung pada kemajuan sains dan teknologi diimbangi dengan keperluan-keperluan rohani sebagai memenuhi tamaddun dan kebudayaan yang tinggi.

Saudara-saudara sekalian,

Tugas utama kita hari ini ialah memberi makna kepada hasrat dan cita-cita ini. Tiap-tiap seorang warganegara Malaysia yang mengakui cinta kepada bangsa dan negara ini mestilah memenuhi tanggungjawab masing-masing dengan khidmat dan bakti, bukan semata-mata pada bibir mulut sahaja. Baik apa jua lapangan hidup yang kita pilih, adalah menjadi kewajipan kita bersama-sama memastikan supaya hikmat Rukunegara itu benar-benar menjadi kenyataan. Inilah pengertian yang penuh dari Dasar Ekonomi Baru.

Mengenai Dasar Ekonomi Baru khususnya, saya telah seringkali menegaskan bahawa inilah langkah muktamad yang akan menentukan untung nasib bangsa dan negara di masa akan datang. Objektif Dasar Ekonomi Baru adalah meliputi semua rakyat warganegara Malaysia dan bukan untuk satu kaum kelompok atau golongan. Hakikat inilah yang saya mahu difahami sepenuhnya oleh setiap orang dan janganlah ada lagi syak wasangka bahawa hanya kaum Bumiputra yang mendapat munafaat dari pelaksanaan Dasar Ekonomi Baru itu. Kerajaan adalah melaksanakan Dasar Ekonomi Baru itu dengan cara adil kepada semua golongan rakyat Negara ini.

Negara kita ini adalah unique atau istimewa kerana pembahagian penduduknya yang sedemikian rupa serta cara hidup kita yang saling bergantung satu sama lain. Oleh kerana itu amatlah mustahak difahami oleh semua bahawa segala peluang yang terbuka ialah untuk semua dan bagi kebajikan bersama.

Saya suka menegaskan, terutama kepada orang-orang Melayu dan Bumiputra, bahawa Kerajaan hanya dapat menyediakan peluang-peluang menerusi rancangan besar-besaran, samada di bidang perindustrian. Begitu juga dengan kemudahan-kemudahan latihan dan persediaan bagi menyesuaikan diri untuk merebut peluang-peluang yang terbuka itu. Inilah hakikat yang saya tegaskan semasa melancarkan Gerakan Pembaharuan awal bulan ini yang pada pokoknya menghendaki perubahan sikap dan keberanian menghadapi cabaran supaya hasrat kita membina masyarakat makmur dan adil tercapai dengan penuh kejayaan.

Saudara-saudara sekalian,

Perkembangan-perkembangan yang berlaku di sekeliling kita, baik di dalam maupun di luar negeri, menunjukkan natijah-natijah yang baik bagi negara. Suasana politik dalam negeri jauh sudah meninggalkan tempuh-tempuh pergolakan di mana setengah-setengah pihak lebih mengutamakan kepentingan parti daripada negara. Hari ini kita melihat suasana yang semakin sihat kerana kecuali satu golongan politik yang kecil, ternampak kemungkinan dalam masa yang tidak lama membentuk satu barisan kebangsaan yang luas atau national front di kalangan parti-parti politik untuk menghadapi masalah-masalah negara bersama-sama. Saya percaya seluruh rakyat akan mengalu-alukan perkembangan ini yang akan membawa kita lebih dekat kepada matlamat perpaduan dan seterusnya mencipta masyarakat adil dan makmur.

Perkembangan terakhir dalam arena politik luar negeri menunjukkan tanda-tanda ke arah suasana yang lebih cerah dengan semakin berkurangnya ketegangan antara kuasa-kuasa besar. Lebih hampir kepada kita ialah pergolakan di kawasan Indo Cina dan di sinipun kita mengharapkan semuga usaha-usaha semua pihak untuk memulihkan keamanan di kawasan itu akan tercapai.

Bagi kita Malaysia khususnya, bersama-sama dengan negara-negara sahabat dan jiran, akan terus mengusahakan peluasan konsep menjadikan rantau Asia Tenggara ini kawasan damai, bebas dan berkecuali, daripada satu ideal yang patut diusahakan untuk merupakan hakikat kenyataan sebenarnya. Saya percaya dengan sokongan dan kerjasama dari semua, dan atas keyakinan serta kejujuran kita hasrat suci ini akan tetap tercapai.

Saudara-saudara sekalian,

Hari Kemerdekaan adalah besar maknanya bagi semua rakyat mengukuhkan tekad dan membaharui azam berusaha dengan lebih giat membina masyarakat adil dan makmur. Saya ingin saudara-saudara memandang ke dalam secara introspective dan bertanya pada diri sendiri apakah satu sumbangan bererti yang telah kita berikan untuk masyarakat dan negara selama setahun yang lalu ini. Kalau pun sudah ada, saya percaya tentulah kita sanggup dan bersedia memberikan bakti yang lebih lagi di masa depan. Bagi mereka yang belum, saya ingin mengingatkan lagi bahawa Kerajaan menghendaki sambutan positif dari mereka menyumbangkan bakti demi kebaikan mereka sendiri, masyarakat dan negara. Kebahagiaan hidup tidak datang sendiri kepada kita kecuali kita sendiri sanggup mengambil kesempatan yang disediakan itu.

Saudara-saudara sekalian,

Mengingat bahawa Rancangan Malaysia Kedua baru dalam pelaksanaan, masanya terlalu awal bagi kita mengukur setakat mana matlamat yang telah dicapai hingga kini. Biasanya orang mengukur kejayaan dengan per capita income tetapi buat kita ini tidaklah bermakna. Kita sedang membangun dan hasil usaha-usaha pembangunan ini akan mengambil masa. Bagaimana pun, rakyat yang turut melibatkan diri sudah pun dapat menikmati faedah darinya samada dalam bentuk rancangan tanah FELDA atau pun di kilang perindustrian, sama ada biasiswa di Perguruan Tinggi

dalam negeri atau pun untuk latihan ikhtisas di sebarang laut, samada nelayan di laut lepas atau pun pekerja balak di hutan rimba.

Inilah bukti bahawa kita sedang bergerak dan akan terus bergerak dengan penuh keyakinan dan kepercayaan bahawa setiap rakyat Malaysia akan merasai kehidupan yang sempurna dan bahagia dalam negara aman dan makmur selama-lama.

Semuga Allah memberkati kita semua. Selamat malam.